

錢塘遺事卷之七

武陵 劉一清 編

下蘄黃州

德祐乙亥正月北兵順流而下沿江諸將多呂氏部曲望風降附既至黃州陳奕以城降奕始謂大兵以襄漢船自漢入江乃知大兵未渡而蘄黃已先降故其渡也襄漢蘄黃之船皆在焉遂至蘄州管景謨以城降至南康軍葉昌以城降

劉整死

正月初七日劉整死初整與文煥分兵南渡及是整無功發憤得疾死于無爲軍城下

下江州

正月十三日下江州九江江西屏蔽也錢真孫以帥兼守舉城以降則江西一路如破竹矣嘗記宋太祖以乙亥年命曹翰取江州後三百年乙亥而失之豈非數歟呂師夔以大元命知江州

下安慶

大元國兵至安慶府范文虎以城降文虎呂氏壻也賈似道奏云文虎爲趙縉所憤激而以安慶叛而不知文虎與呂氏係親黨也

賈相出師

甲戌十二月以賈似道爲都督軍馬黃萬石李珣參贊軍事檄召諸路軍兵聽督府調遣於封樁庫撥給金十萬兩銀五十萬兩關子一千萬貫充都督公用時邊報轉急似道猶未有行意聞劉整死乃議出師乙亥正月十五日似道上出師表略曰臣以老病之身遭時多艱豈復能以驅馳自勉云云每念身雖危可以奮勵振事雖急可以激烈圖云云逆整世受國恩一旦反噬而仇視我役役貪生畏死視便則趨夫亦何有於彼哉自襄有患五六年間行邊之請不知

錢塘遺事卷七

二

幾疏先帝一不之許襄陷鄂單臣憂心孔疚請行又不知其幾疏先帝復不之許頃羅孔棘詔旣奪情臣辭亦不知幾迨不獲命竊自附於金革無避之義陛下踐祚以來邊劇日駭臣請悉力政以江流數千里江面數十屯而脈絡不貫非臣督視隨機上下是必有不能遏其渡江者今不幸臣言中矣向使先帝以及兩宮下至公卿大夫士早以臣言爲信聽臣之出當不使如此往者不可諫及今汲汲圖之恨其晚尙可強臣之留耶臣留不過使都民苟安且暮而非所以爲宗社大計也陛下惟命臣以王導故事都督中

外諸軍然兵入吾境亦既兼旬臣苦心處置忘寢廢食未能少強人意誠以注的之矢難留在目之機易見與其坐待其來于事無補孰若使臣決於一行以求必勝事理較著有不難知者恭惟祖宗三百餘年德澤其來未艾兩宮仁慈孝愛動無闕失臣恃此咸發信順之心斷可憑藉以辦此事臣羸弱之軀非不知自愛云云孤忠自誓終始以之臣有三子三孫留之京師日依帝所以示臣無復以家爲意否則苟免而已寧不愧死於斯言哉深切迫急拜表卽行

遣使請和

錢塘遺事卷七

三

德祐乙亥二月十七日賈似道遣宋京使軍前請和京與北使來要似道自往似道遣阮思聰束元嘉代行思聰回知事不就惶怖失據陰備快船爲走計時大軍乘勢衝下南北兩岸立砲座設划車中流數千艘乘風直進宋兵不支夏貴老將也旣失長江惟恐督府成功無所逃罪又恐孫虎臣新進位出已上殊無鬪志

下饒州

乙亥正月大兵至饒州守臣唐震竭力守禦城破震爲北兵所害死于州治之玉芝堂二十一日城破二

十七日鄔判官始得其遺體溫然如生遂具衣棺而葬之前丞相江萬里寄居饒州州人皆遁萬里坐守以爲民望兵入其第赴水而死萬頃自南康來省兄遇兵不屈遂以磔死至死罵聲不絕口先是張世傑至饒州萬里與之飲大醉世傑曰國事如此丞相如何萬里曰力不能以報朝廷惟有死爾世傑曰丞相之言是也他家事世傑盡知之拿一个蓋跪在地不能得他接接了未能得他飲安能忍辱事他人耶吾盡吾職分延得一日也是趙家一日之天下如不可爲亦只有一死庶幾可見趙皇於地下觀此則萬里

錢塘遺事卷七

四

從容就義之心已先決矣

破池州

乙亥正月大兵破饒州遂至池州時池州無守臣蜀人趙昂發爲池州倅權州事措置備禦等官謂昂發曰州不可守不如棄之昂發曰吾守土臣也豈可偷生避死也哉大兵至畱詩於第夫婦遂自經而死時人語之曰臣爲君死妻爲夫亡

蕪湖潰師

乙亥正月二十二日賈似道潰師於蕪湖是日三鼓孫虎臣告急至似道舟中泣告曰追兵已迫夏貴亦

日彼眾我寡委難抵當垂泣而去似道撫諭三軍遂許喝轉官資諸軍詎曰要官資做甚己未庚申官資何在鳴鑼一聲退兵於珠金沙十三萬軍一時潰散督府之印已失似道奔入揚州李庭芝閉城不納

姜才敗績

大兵順流乘勢至瓜州揚州都統姜才出兵二萬餘於揚子橋士氣百倍眾皆披靡時彼眾我寡相持半日凡數十戰勝負未分生兵日增乃至敗績姜才稍引兵還大兵入太平州守臣趙縉遁

金山之敗

錢塘遺事卷七

五

大兵入建康府沿江兩置知建康府趙縉遁北兵方入城時察院潘文卿按趙縉取行宮公帑所積金帛棄城而遁建康爲江東重鎮旣失則江東之勢去矣北兵駐建康府不進遣哨騎四出大兵至鎮江府張世傑趙縉戰于金山世傑多海舟無風竟不可動遂敗畱守司參軍沈圻自柁樓上墜下嘔血而死守臣洪起畏遁嗚呼京口第一重門戶而失之行闕岌岌矣

趙與可遁

乙亥二月大兵入寧國府守臣趙與可遁與可宗室也而望風宵遁朝旨除名勒停追毀出身以來文字

以爲不守封疆者之戒旣北兵下徽州

二相遁去

乙亥二月二十六日左丞相王爚去先是賈似道奏請遷都太皇太后不許及是殿前指揮使韓震再申前請爚議堅壁固守求罷不允徑去三十日夜右丞相章鑑遁二相去國朝廷事可知矣

誅韓震

乙亥三月初一日誅韓震三省奉聖旨云韓震身爲殿帥陰懷異志當此危急不肯出戰聲言提兵闕入禁闕姦謀叵測罪不容赦國人皆曰可殺吾念其父

錢塘遺事卷七

六

有功于蜀不料其子負國若此除已明正典刑罪止其身若家屬親黨決非同謀一切並爲免罪先是有言震謀脅遷都者宜中與客潘希仁計議乃伏甲士于樞密府擊殺之以步軍指揮使領其眾震部曲百餘人聞變太閔而出射火箭入大內又以大刀斫嘉會門宜中遣兵逐之奔建康府

五木之敗

北兵入常州府時三月初二也知州王宗洙遁權守節幹王良臣以城降五月張彥劉師勇復常州王良臣敗走又復廣德軍九月王良臣以北兵攻常州知

府姚訔統制劉師勇王安節拒守攻城不克十月常州告急文天祥遣將尹玉朱華張全麻士龍赴援二十六日戰于橫林敗績二十七日戰于五木敗績張全不發一矢尹玉麻士龍死之天祥調兵再往道不通十一月十六日常州糧盡劉師勇以騎突圍出奔平江府遂破常州屠其城知府姚訔死之生獲王安節不屈而死姚訔乃姚希得之子王安節乃節度王堅之子尹玉者江西憲司將也與北兵戰殺數千人復收殘兵五六百與角一夕兵敗手殺七八十人遂死之其麾下與北兵戰併死無一降者朝廷贈濠州

錢塘遺事卷七

七

團練使官其二子焉常州自三月二日陷至五月再復九月北兵再至知府姚訔糾集義民登城巡視旌旗雲擁鼓聲震天潛遣劉師勇王安節等出師迎敵大捷次日北兵至城下開門迎戰二陣夾擊攻城之兵爲其掩殺攻城不克而遁劉師勇又于歸路設伏以待之殲者過半常州雖能保城而管下屬縣屋宇焚蕩人民擄掠殆盡生獲百姓殺之齧其肉煎油作砲擲入常州城下使膏油散在牌杈木上積日使火箭射之牌杈自焚又俘其人使之運土于城外築堡傾泥併其人填之常州屬縣之民遭此橫禍十一月

糧盡城始破嗚呼使北兵渡江之後州州有守臣如姚訔者忠于國家死守封疆宋鼎又安得而轉移耶

朝臣宵遁

乙亥三月京師戒嚴朝臣接踵宵遁大軍已迫畿甸勤王兵不至人情恟恟知臨安府曾淵子兩浙運副皆遁浙東提舉王霖龍遁機政文及翁倪普臺諫潘文卿季可陳過徐卿孫待從已下陳堅何夢桂曾希顏數十人並遁朝中爲之一空焉朝堂榜云孟軻謂君視臣如草芥則臣視君如國人又謂諫于其君而不聽去則窮其力而後止識者猶以爲非君臣之正

錢塘遺事卷七

八

誼我朝三百餘年待士大夫以禮吾爲嗣君遭家多難爾小大臣未嘗有出一言以救國者吾何負于汝哉今內而庶僚畔官離次外而守令委印棄城耳目之司旣不能爲吾糾擊二三執政又不能倡率羣工方且表裏合謀接踵宵遁平日讀聖賢書自負謂何乃于此時作此舉措或偷生田里何面目對人言語他日死亦何以見先帝天命未改國法尙存可尙書省別具在朝臣在京文武並予特轉二官其負國棄予者令御史臺覺察以聞其榜朝堂明吾之意

罷賈似道

乙亥三月三日賈似道罷平章都督予祠宣制曰大臣具四海之贍罪莫大于誤國都督行諸軍之事律尤重于喪師告九廟以奉辭詔羣工而聽命具官賈某小材無取大道未聞昔相穆陵徒以邊將而自詭逮事先帝遂于國事以獨專謂宜開誠布公以扶皇極之彝并謀合智以盡天下之議而乃恣行胸臆不恤人心以吏道沮格人才以兵術剝裁機務括田之令行而農不得安于野權利之法變而旅不願出其途矧當任闡之驅馳不知戎事之緩急戰攻或曠歲而不舉兵事或臨時而不修纖悉于文法之搜求闕

錢塘遺事卷七

九

疏于邊政之科瑣遂令飲馬以渡長江迺者抗表出師請身戮難人方期以孔明之志朕亦責以裴度之功謂當披髮纓冠而疾趨乃復二矛重弓而容與三軍解體百將離心彼被甲之謂何未聞聲而先潰孟子謂吾何畏彼左氏謂我不成夫社稷之勢綴旒縉紳之言切齒姑與薄罰俾爾閑祠於戲膺戎狄懲荆舒今復奏周公之事放驩兜殛伯鯀尙思寬虞典之誅可罷平章軍國重事都督諸路軍馬十四日賈似道遣堂吏翁應龍護都督印歸朝上表自劾至五月太后乃降詔令李庭芝宣意略云卿其亟歸喪次以

盡臣子之道當曲示保全否則眾論益甚忠孝靡容
吾雖欲屈法伸恩而不可得卿其明聽吾言善終以
始亦有辭于永世時左相王燾奏陛下念其勤勞三
朝免于遠竄使之歸里終喪忠厚之至既數辭矣安
坐維揚未聞就道既不能死忠又不能盡孝遂使公
論切齒愈甚願降一明詔切責似道以正方命之罪

貶賈似道

乙亥七月十二日合臺奏賈似道喪師誤國內批賈
似道專權誤國得罪公論吾以其歷事三朝近嘗許
以終制不欲已甚合臺露章未已更與降三官改徙

錢塘遺事卷七

十

鄰郡少弭人言時賈似道婺州居住廖瑩中王廷追
毀文字除名勒停選韶州羈管內批王廷曾淵子改
送雷州居住赦賈似道降三官改送建寧居住翁合
奏賈似道以妬賢無比之林甫輒自託于伊周以不
學無術之霍光敢效尤于莽操其總權罔上賣國召
兵專利虐民滔天之罪人人能言云云首聞邸報臺
諫交章聲其姦謀乞行遠竄迫于眾怒僅謫建寧雖
國家之典憲未伸而朝廷之意向稍白臣切伏惟建
寧實朱子講道之闕里雖三尺童子粗知向方聞似
道且嘔惡唾去況可見其面如朱釋大學一章曰放

惡不遠彼且稔惡所伏之地其民何罪必以禦魑魅
而後已夫與之同中國且不可而可一日同此鄉哉
必放之此鄉此鄉亦復何罪巷伯惡惡之詩曰投畀
有北有北不受而終曰投畀有昊蓋有北決所不受
則付與昊天惟天得制短長六合爾此則陛下事也
乞將似道遠竄深廣以伸國法以謝公論有旨賈似
道移漳州責授高州團練副使下臨安府台州簿錄
其家

相陳宜中

乙亥三月初三日陳宜中參知政事陳合僉書樞密

錢塘遺事卷七

十一

院召王燾還朝初十日陳宜中除右丞相初四日宜
中辭相奏云臣今月初四日恭準內批不許臣辭免
新除特進右丞相恩命念臣一介樸愚初無矯飾此
番出位奉行陛下如神之斷將順陛下如天之仁實
出于愛君憂國之血忱非有一毫傾人利己之私念
皇天厚地實所鑒臨今若許臣以舊官備位人猶謂
臣無所爲而爲之可以少追清議若不先不後于此
易變恩榮公論無情何所不至或謂臣乘時傾似道
而奪其權或謂臣拱手不畱臣鑑而據其位臣旣無
面顏立于百僚之上亦安能復有精神念慮能爲陛

下宜一日之勞哉自魯港敗後宜中首斬韓震脅遷
之議差強人意宜中實無經濟至秋託故遁歸及不
得已十月再來則國事去矣

錢塘遺事卷七

十二